

FESTA EZALTASAUN SANTA KRÚS – TINAN A

Tema

Liturjia Domingu ne'e nian, Festa Ezaltasaun Santa Krús nian, konvida ita atu kontempla Jezús nia krús. Nia mak espresaun aas liu Maromak nia domin nian; Maromak ida ne'ebé mai hasoru ita, aseita partilla ita-nia umanidade, halo an ema nia atan, husik ema oho Nia atu manán egoíзму no salan. Hodi oferese nia moris iha krús, nu'udar prezente domin nian, Jezús hatudu mai ita dalan atu to'o ba moris nakonu.

Leitura dahuluk ko'alia mai ita kona-ba Maromak ida ne'ebé nunca abandona ninia Povu iha ninia dalan, tulun nia komprende sentidu kona-ba ninia hilin laloos sira no konvida nafatin nia atu keta para atu buka moris no liberdade loos. Samea riti nian ne'ebé harii iha ai-riin ida, hatudu Maromak nia vontade atu fó moris ba ema sira no proteje ema husi forsa aat sira ne'ebé harahun nia durante ninia pergrinasaun iha rai; no husi sorin seluk, nia mak símbolu forsa salvífika suli husi Kristu nia krús – mane ne'ebé foti sa'e atu haraik moris ba mundu tomak.

Iha *leitura daruak*, Paulo apresenta ba sarani sira Filipos nian leitura ida inkarnasaun Kristu nian. Jezús, Maromak nia Oan doben, hakribi orgullu no foti-an, atu hili dalan obediénsia nian ba Aman no serví nian ba ema sira, to'o saran moris rasik. Krús mak espresaun aas dalan no opsaun ne'e nian. Ne'e mak dalan ne'ebé fiar-na'in husi tempu no faitn hotu simu konvite atu hakohak no la'o tuir.

Iha *Evanjellu*, João fó hanoin katak Maromak hadomi tebes ita, to'o haruka mai ita nia Oan-Mane mesak atu oferese moris rohan-laek mai ita. Evanjellu konvida ita atu hateke ba Jezús nia krús, atu aprende ho nia lisaun domin totál nian, atu la'o ho Jezús iha dalan saran moris nian. Ida-ne'e mak dalan salvasaun nian, moris nakonu no definitivu nian.

LEITURA I - Num 21,4b-9

Livru Números nian (hanaran nune'e iha versaun grega, tanba livru hahú ho lista ida resenseamentu nian kona-ba número membru sira Maromak nia Povu nian), apresenta konjuntu ida tradisaun sira-nian – laho preokupasaun ba koerénsia no lójika – kona-ba ebreu sira nia estadia iha rai-fuik maran, hafoin liberta tiha husi Ejitu. Tradisaun sira iha orijen lahanesan, no teólogo sira husi eskola jahwista, elohista no saserdotál utiliza ho finalidade katekétika.

Livru fahe ba parte tolu. Parte dahuluk, ko'alia kona-ba Povu nia lora ikus sira hela iha Sinai (kf. Nm 1,1-10,10); parte daruak apresenta, iha etapa oioin, Povu nia dalan iha rai-fuik, husi Sinai ba rai-tetuk Moab nian (kf. Nm 10,11-21,35); datoluk, apresenta comunidade Israel nia oan sira hela iha rai-tetuk Moab nian, hodi prepara an atu tama iha Rai Prometida (kf. 11,1-36,13).

Liufali krónika viajem Povu nian husi Sinai, to'o Rai Prometida nia odamatan, Livru Números nian mak livru ida katekeze nian. Nia hakarak hatudu katak Israel nia esénsia mak sai Povu ida hadulas hale'u Jahwéh no ALiansa. Ho idealizmu ruma, autór sira deskreve oinsá, hodi Jahwéh nia liman, grupu ema la'o-rai sira ne'ebé hetan libertasun husi Ejitu, ho modu progresivu manán konxiénsia nasionál no relijioza, to'o forma “assembleia santa Maromak nian”. Iha perkursu jeográfiku liuhusi rai-fuik, Israel halo dalan espirituál ida, iha-

ne'ebé sira neineik-neineik liberta an husi mentalidade atan nian, atu manán kultura ida liberdade no maturidade nian. Autor hatudu oinsá, hodi Maromak nia liman (ne'ebé horik nafatin iha Povu nia leet), Israel ho modu progresivu sai tasak, hafoun an, nakfilak an, haluan neon, hodi sai Povu ida responsavel liután, konxiente liután, adultu liután no santu liután. Epizódiu ne'ebé ohin propoin mai ita situa ita iha rai-fuik Neguev nian, iha tasi-mane Palestina nian. Tanba ema Edom nian impede sira liu husi sira-nia rain (kf. Nm 20,14-21), ebreu sira dirije ba tasi-mane liu husi “dalan tasi Juncos nian” (Nm 21,4), haleu fronteira Edom nian, iha diresaun ba golfu Aqaba nian.

MENSAJEN

Autor testu nian konta katak Povu, la'o iha rai-fuik maran, kolen no kabeik ona ho hahán hanesan (maná), esprime sira-nia laran lakontente hasoru Maromak no hasoru Moisés; no Maromak, nu'udar kastigu, haruka samea ho venenu ne'ebé tata revolta-na'in sira no kastiga ho mate Povu ne'ebé rebelde... Arrepente no rekoñese sira-nia salan, sira husu Maromak perdua sira... Entaun, Maromak haruka Moisés harii samea riti nian no tau iha ai-riin aas atu ema ne'ebé hateke ba nia la mate.

Iha istória ne'e nia kotuk, ita hetan relijiaun barak iha Médio Oriente antigu ne'ebé liga samea ho moris... Entre kananeu sira, n.e., samea liga ho kultu fertilidade nian no sai objetu venerasaun nian iha fatin aas sira: kultu sira-ne'e destina atu asegura, tinan-tinan, moris nia kontinuasaun – ba to'os, ba balada sira, ba ema mós. Husi parte seluk, uzu amuletu nian ho figura samea nian serve atu proteje forsa aat sira no kura moras (hodi halo eskavasaun arkeolójika iha Guezer, Meggido no Meneiyeh - ohin Timna – besik golfu Aqaba nian, halo deskobre ezemplár barak amuletu sira-ne'e nian). Iha Templu Jerusalém mós tama samea ida riti nian ne'ebé ema Israel sira hamulak bá, no liurai Ezequias harahun tiha, bainhira halo reforma relijioza hodi purifika relijiaun jahwista (kf. 2 Re 18,4)... Tuir biblista balun nia opiniaun, istória ne'e bele mós sai istória ida atu esplika realidade tansá iha samea riti iha Templu Jerusalém nian ba tempu ruma, iha-ne'ebé israelita sira ba hamulak hodi husu moris no protesau hasoru forsa aat.

Buat ne'ebé ita-nia testu hakarak dehan mak samea riti nian ne'e, ba israelita sira mak símbolu ida Maromak nia laran-di'ak, mizerikórdia no domin ba Povu. Ho nia, katekista bíbliku dehan mai ita katak maski Israel kontra Maromak no lakohi tuir dalan fidelidade nian ba Aliansa, hahalok ne'e la impede Jahwéh atu oferese ba Povu moris nakonu.

Samea riti nian foti sa'e iha ai-riin ida, no husi nia Maromak haraik moris na nia Povu no proteje husi forsa ne'ebé harahun sira iha dalan peregrinasaun iha rai-fuik, sei fó ba autor Evanjellu Dahaat nian símbolu di'ak ida atu espresa forsa salvífika ne'ebé suli husi Kristu nia krús – mane ne'ebé hasa'e aas atu haraik moris ba mundu.

LEITURA II – Filip 2,6-11

Sidade Filipos nian mak sidade próspera ida, ho populasaun maioria veteranu tropa romanu sira. Sidade ne'e organiza tuir maneira Roma nian, no depende diretamente ba imperadór; nune'e mak nia goza priviléjiu hanesan ho sidade sira Itália nian. Komunitade sarani, ne'ebé Paulo funda, mak comunidade laran-manas ida, laran-luak, komprometida, nafatin iha atensaun ba Paulo no Igreja seluk nia nesesidade (hanesan kolekta sira halo ba Igreja Jerusalém nian – kf. 2 Cor 8,1-5). Paulo iha afetu/domin espesial ba comunidade ne'e. Maski iha sinál pozitivu sira-ne'e, comunidade la'ós perfeita... Dezapegu, haraik-an no simplisidade la'ós valór sira ne'ebé ema boot riku comunidade nian sira apresia.

Iha enkuadramentu ida-ne'e mak ita koloka testu leitura ohin nian. Paulo konvida Filipense

sira atu enkarna valór sira ne'ebé marka Kristu nia moris; tanba ne'e nia utiliza knananuk ida (pré-paulinu), ne'ebé sarani sira resita iha selebrasaun litúrjika sarani sira-nian. Paulo ho knananuk ne'e apresenta ba sarani Filipos nian, Kristu nia ezemplu.

MENSAJEN

Motivu knananuk nian mak Kristu Jezús ne'ebé temi iha inísiu no finál inu ne'e nian. Filipense sira, nu'udar kristaun, ne'e katak Kristu mak protótipu no tuir ilas ne'e mak sira tenke konfigura an. Oinsá loos ezemplu Kristu nian?

Uluknanai knananuk ne'e hatudu kontraste entre Adão (ema ne'ebé hakarak sai hanesan Maromak no dezobedese Nia – kf. Gn 3,5.22) no Kristu (Ema Foun, ne'ebé hatán ho haraik an no obediénsia ba Aman). Adão nia atitudo lori frakasu no mate; Jezús nia atitudo lori glória no moris.

Knananuk define “despojamentu” (“kenosis”) Kristu nian ho modu presizu: la foti An ba ninia kondisaun divina, maibé aseita sai ema, hodi asume ho haraik-An kondisaun umana, atu serví, atu fó moris, atu revela Aman. Maski nia Maromak no kontinua sai Maromak, Nia aseita atu tuun atu hasoru ema sira, sai servidór hodi garante moris foun ba ema sira. “Hatuun An” ida-ne'e sai eskándalu boot: Jezús aseita mate ne'ebé aat liu – mate iha krús – atu hanorin lisaun boot servisu nian, domin radikál, entrega totál moris nian.

Entrega an totál ba Aman nia planu la'ós frakasu ida: Kristu nia obediénsia no entrega ba Aman nia projetu rezulta moris-hi'as no glória. Konsekuénsia ba Ninia obediénsia, domin no saran An, mak Maromak foti nia ba “Kyrios” (“Na'i” – naran ne'ebé, Antigu Testamentu, troka ba Maromak nia naran ne'ebé labele temi); no umanidade tomak (“lalehan, rai no infernu sira”) rekoñese Jezús nu'udar “Na'i” be ukun rai tomak no prezide istória.

Iha-ne'e Paulo halo apelu ba Filipense sira no fiar-na'in hotu atu iha haraik-an, dezpojamentu, saran moris: sarani hotu tenke halo tuir Kristu nia ezemplu, atan terus-na'in no haraik an, ne'ebé halo nia moris sai don ida ba ema hotu. Dalan ne'e la hamohu ema, maibé lori nia ba glória, ba moris nakonu.

EVANJELLU – Jo 3,13-17

Ita-nia testu pertense ba sesaun introdutória Evanjellu Dahaat nian (kf. Jo 1,19-3,36). Iha sesaun ne'e, autór apresenta Jezús no buka – liuhusi kontributu personajen oioin ne'ebé mosu no okupa sentru palku nian no deklama sira-nia testu – atu dehan sé mak Jezús.

Testu apresenta Jezús ne'ebé dada lia ho “xefe ida judeu sira-nian” hanaran Nicodemos (kf. Jo 3,1). Nicodemos bá vizita Jezús “iha kalan” (kf. Jo 3,2), Parese nia lakohi tau iha risku ninia pozisaun iha estrutura relijioza judaika. Membru Sinédriu nian, Nicodemos sei mosu hikis, atu defende Jezús iha xefe farizeu sira nia oin (kf. Jo 7,48-52). Nia mós presente iha altura hatuun Jezús husi krús no tau iha rate (kf. Jo 19,39).

Konversa entre Jezús no Nicodemos apresenta etapa eh faze tolu. Dahuluk (kf. Jo 3,1-3), Nicodemos rekoñese Jezús nia autoridade, tanba Ninia obra sira; maibé Jezús hatutan katak ne'e la to'o: esensiál mak rekoñese Jezús nu'udar Ida-ne'ebé Aman haruka.

Daruak (kf. Jo 3,4-8), Jezús fó sai ba Nicodemos katak, atu komprende Ninia proposta, presiza “moris husi Maromak” no esplika ba nia katak moris foun ne'e mak moris iha “bee no Espíritu”.

Datuluk (kf. Jo 3,9-21), Jezús haktuir ba Nicodemos Maromak nia projetu salvasaun: iniciativa ida Aman nian, sai presente iha mundu no iha ema sira nia moris liuhusi Oan-Mane no sei konkretiza liuhusi krús /Jezús nia ezaltasaun. Ita-nia testu pertense ba parte datoluk.

MENSAJEN

Jezús hahú hodi esplika ba Nicodemos katak tenke “foti sa’e aas” mesias, hanesan “Moisés hasa’e samea” iha rai-fuik (referénsia fó hanoin ba epizódiu la’o iha rai-fuik leitura dahuluk nian – kf. Nm 21,8-9). Ilas “foti sa’e” refere ba krús – ain-hakat ne’ebé presiza atu to’o ba ezaltasaun, ba vida definitiva. Iha krús mak Jezús manifesta ninia domin, hodi hatudu dalan ne’ebé ema sira tenke tuir atu to’o ba salvasaun, moris nakonu (vers. 14).

Nia husu ba ema sira atu fiar iha “Mane Makso’ik” foti sa’e iha krús, atu keta lakon maibé hetan moris rohan-laek. “Fiar” iha “Mane Makso’ik”, signifika adere ba Nia no Ninia proposta moris nian; signifika aprende lisaun domin nian no halo, hanesan Jezús, saran moris rasik nu’udar don ida ba Maromak no ba maun-alin sira (vers. 15). Ho forma ne’e mak sei to’o ba “moris rohan-laek”.

Depoizde afirmasaun jerál sira-ne’e, autór Evanjellu Dahaat nian tama iha afirmasaun ho detalle liután. Sá loos signifikadu loloos, Jezús nia krús? Oinsá mak krús fó moris definitivu ba ema?

Jezús, “Oan-Mane mesak” ne’ebé Aman haruka atu hasoru ema no lori ba sira vida definitiva, mak Maromak nia domin nia don boot liu ba humanidade. Espresaun “Oan-Mane mesak” halo hanoin, provavelmente, “Isaac nia sakrifisiu” (kf. Gn 22,16): Maromak nia hahalok hanesan Abraão nian, ne’ebé iha kapasidade atu husik nia oan rasik tan domin (iha kazu Abraão nian, domin ba Maromak; iha kazu Maromak nian, domin ba ema sira)... Jezús, “Oan-Mane mesak”, mai iha mundu atu kumpre Aman nia planu sira ba ema nia di’ak. Ba ne’e, nia inkarna iha ita-nia istória umana, asume ita-nia frajilidade, partilla ita-nia humanidade; no, nu’udar konsekuénsia ba Ninia moris ida luta nian kontra kbiit sira nakukun no mate nian ne’ebé halo ema sai atan, sira kaer Nia, tortura Nia no oho Nia iha krús ida. Krús mak hahalok ikus ema ne’ebé moris iha domin, iha doasaun, iha entrega. Nune’e, krús mak espresaun aas liu Maromak nia domin nian ba ema sira. Nia haraik mai ita, dimensaun sukata-laek Maromak nia domin nian ba humanidade, ne’ebé Nia hakarak ofere se salvasaun (vers. 16).

Sá loos Maromak nia objetivu hodi haruka nia Oan-Mane mesak atu hasoru ema sira? Atu liberta ita husi egoíзму, husi moris-atan, husi alienasaun, husi mate, no haraik ba sira moris ne’ebé la nahas. Ho Jezús – “Oan-Mane mesak” ne’ebé mate iha krús – ema sira aprende katak moris definitivu mai de’it husi obediénsia ba Aman nia planu no iha don moris nian ba maluk sira, tanba domin.

Hodi haruka nia “Oan-Mane mesak” mai mundu, Maromak la iha intensaun negativa ida, maibé intensaun positiva ida. Mesias la mai ho misaun atu kondena ema, la mai atu ezklui ema ruma husi salvasaun. Iha kontráriu, Nia mai ofere se moris ba ema hotu, moris definitivu, hodi hanorin sira hadomi lahó sasukat no haraik ba sira Espíritu ne’ebé nakfilak sira sai Ema Foun (vers. 17).

Nota didi’ak faktu ne’e: Maromak la haruka nia Oan-Mane mesak ba ema perfeitu no santu sira; maibé ba ema maksalak sira, egoísta sira, autosuficiente sira, atu apresenta ba sira proposta foun moris nian... No Jezús nia domin – nune’e mós Espíritu ne’ebé Jezús husik mak nakfilak ema egoísta, foti-an, autosuficiente sira-ne’e no integra sira iha dinámika ida moris foun no nakonu nian.

Atu halo rezumu: tanba hadomi humanidade, Maromak haruka nia Oan-Mane mesak ho proposta ida salvasaun nian. Oferta ne’e nia nunca dada hikas fali; oferta ne’e kontinua nakloke no hein resposta. Iha Maromak nia oferta nia oin, ema bele hili moris rohan-laek, eh bele ezklui nia an husi salvasaun.